

Cietdahsau Lingzconh

□ Maj Veiungz comz hoiz



Nazngaex gyaunde yinx vunz.



▲ Bae ndaw coengceiz
ciep Guxiq maranz.



▲ Cingj "Guxiq" hwnj giuh.



▲ Va' ngauez dujduj
gyaunde coux Guxiq.



▲ Diuq foux va' ngauez
vunzlai angqyangz.

Lingzconh Yen Giujvuz Cin Mbanjyanghdouz youq baihsae Dah-hohlungz, gyawj bya gyawj dah, gij vunz diegde hix cinghseuq lauxsaed, dwg aen mbanj lwglan Sungciuz Couh Dunhyiz youq dieg neix guh haenx, daengz seizneix gaenq miz cien lai bi lo. Gij ranz Mbanjyanghdouz deugyoeng gyaqciq, dan deuva couh miz 20 lai cungj 500 lai yiengh. Vunz cwng guh "Cungguek aenmbanj deuva daih' it".

Cienznaeuz Mingzciuz satbyai, aen ranz hoj ndeu laeng Mbanj-gyanghdouz miz lwgmbwk ndeu heuh Dahhaemz, de coengmingz maenh' ak, gig sughangz guh buh. Moix bi ndwenseiq ndwenngux, Dahhaemz couh bae ndaw naz gvej go' ndaij ma guh buh. Gij sa de doz haenx youh saeq youh maenh, gij baengz de daemj haenx cix unq cix ronghsien, gij doz de siuq haenx lumj gij caen nei. Dinfwngz ndei de couh ciemh-ciemh cienz okbae lo, bouxseng' eiq

cungj haengj laeng de cawx baengz cawx buh. Gij saedceij Dahhaemz bienq ndei le, de caiq bae bang ranz hoj ndaw mbanj caeuq mbanj nden. Gyoengqvunz cungj gig maij de. Dahhaemz haq le, vunzmbanj youh heuh de Guxiq. Miz bi ndeu liggaueq ndwenngux cibseiq, duz roeglingz gamz le fagroi Guxiq deuz, de couh gyaep bae mbouj dingz, baeg le couh youq gwnz gaiq benjrin bakgamj Gamjbyadoeng yietbaeg, mbouj liuh daengz doeklaeng couh baenz sien lo. Gyoengqvunz vih le geiqniemh Guxiq, couh dawz ngoenz de baenz sien haenx dingh guh "cietdahsau", maq-muengh caemh miz dah lwgmbwk ndeu, lumj de gaenxguh simndei nei. Bi 2013, cietdahsau Lingzconh ndaej senj haeuj buek daihseiq swigih gaep feihvuzciz vwnzva yizcanj mingzloeg.

Cietdahsau lij riuz miz gij gangfap "seiq raemx". Liggaueq ndwenngux cibit dwg "raemx swiq

roen", ngoenzde ndaw mbanj bouxsai bouxmbwk, bouxlaux lwgnyez cungj aeu bae baetsauq caeuq dongj swiq gehhohgh ndaw mbanj, caepcawq cieq Guxiq ma; ndwenngux cibngeih dwg "raemx rongfaengx", ngoenz haenx ranzranz hohhoh cungj swiq rong-faengx ma suek faengx, deq Guxiq ma gwn; ndwenngux cibsam cix dwg "raemx baenz cax", moix ranz cungj baenz cax gaj gaeq gaj bit, bae caeq Guxiq; ndwenngux cibseiq dwg "raemx raemxda", dwg naeuz gyoengqvunz sij mbouj ndaej Guxiq, danghnaeuz ngoenzde miz fwn, gyoengqvunz couh nyinhnaeuz dwg Guxiq sij mbouj ndaej bae gyaecouh daej lo. Hoeng seizneix vunzmbanj cungj guh ndwenngux cibseiq ngoenz dog lai lo. Ngoenz cibseiq, vunzlai daj ndaw mbanj senj dahsau swnzsiemh simndei ndeu cang guh "Guxiq" gonq, gyoengqde cix daj coengceiz Maijva' ngauez hwnjdin bae daengz Gamjbyadoeng cieq "Guxiq". Itbuen dwg doih saeceij byaij youq baihnaj, hopngomx daengx mbanj byaij gvaengz ndeu le, youh youq baihnaj coengceiz biujyienj gak cungj cezmu. Doeklaeng hix dwg doih diuqfoux caeuq doih ruzbaengz, byaij itloh couh biujyienj itloh. Vunzmbanj hix fwnz riuj va' ngauez, byaleix aeu ceij guh haenx riengz byaij youq baih-laeng. Caeq Guxiq sat le, banringz-gvaq couh soengq Guxiq ma Gamjbyadoeng lo. Sing gyonglaz angqyangz, singfwen goksat, foux hix gyaecou, daengx mbanj vunz cungj angqvauvau. Sat le couhdwg gak ranz gag gwn haeux lo, hohhoh cungj loengh byaek, lumj faengx Gyanghdouz, nohgaeq, gyaecgaeq hamz, nohgoeb, daeuhfouh raemx ranz Cou daengj, cingj caencik baengzyoux daeuj guh hek.

Cietdahsau Lingzconh gag miz daegsaek haenx, vwnzva senjguen, vwnzva maij va' ngauez Cougyanghdouz cungj yinx gyoengq beixnuengx henzgyawj caeuq haujlai hekyouz daeuj youz, coicaenh gij cienziep caeuq hwnghat lijyouz caeuq vwnzva lajmbanj.



▲ Gyang nazngauez
baijyienj dungxcaiz.



▲ Saeceij fan foux hoh
ngoenzndei.



▲ Angq soengq Guxiq
baema.



▲ Ngoenzciet vunz lai
vunz daih.